

四庫全書

集部

欽定四庫全書

集部

御選唐宋詩醇卷二十四

詳校官侍講<sub>臣</sub>王燕緒

主事銜<sub>臣</sub>徐以坤覆勘

總校官降調編修<sub>臣</sub>倉聖脉

校對官編修<sub>臣</sub>吳舒帷

謄錄監生<sub>臣</sub>薩龍光

欽定四庫全書

御選唐宋詩醇卷二十四

太原白居易詩六

目錄

江州赴忠州至江陵以來舟中示舍弟五十韻

題岳陽樓

入峽次巴東

郡齋暇日憶廬山草堂兼寄二林僧社三十韻皆

叙貶官以來出處之意

陰雨

送蕭處士遊黔南

竹枝詞四首

巴水

別種東坡花樹兩絕

別橋上竹

太平樂詞二首

閨怨詞三首

錄二首

長洲苑

憶江柳

初除主客郎中知制誥與王十一李七元九三舍  
人中書同宿話舊感懷

見于給事暇日上直寄南省諸郎官詩因以戲贈  
西省北院新構小亭種竹開牕東通騎省與李常  
侍隔牕小飲因題四韻

送客南遷

舊房

新昌新居書事四十韻因寄元郎中張博士

勤政樓西老柳

偶題閣下廳

喜張十八博士除水部員外郎

晚庭逐涼

梨園弟子

暮江吟

聽彈湘妃怨

逢張十八員外籍

重到江州感舊遊題郡樓十一韻

題別遺愛草堂兼呈李十使君

舟中晚起

晚興

夜歸

臘後歲前遇景詠意

郡齋暇日辱常州陳郎中使君早春晚坐水西館  
書事詩十六韻見寄亦以十六韻酬之

題小橋前新竹招客

病中逢秋招客夜酌

洛下卜居

郡中西園

九日宴集醉題郡樓兼呈周殷二判官



霓裳羽衣歌

小童薛陽陶吹鳳粟歌

雙石

和微之四月一日作

喜雨

六年春贈分司東都諸公

和微之詩二十三首

錄三首

和三月二十日四十韻

和酬鄭侍御東陽春悶放懷追越遊見寄  
和順之琴者

欽定四庫全書

御選唐宋詩醇卷二十四

太原白居易詩六

江州赴忠州至江陵以來舟中示舍弟五十韻

昔作咸秦客常思江海行  
今來仍盡室此去又專城  
典午猶為幸分憂固是榮  
簞篋州乘送艤艤驛船迎  
共載皆妻子同遊即弟兄  
寧辭浪迹遠且貴賞心并  
雲展帆高掛颿馳權迅征  
泝流從漢浦循路轉荆衡  
山逐時移

色江隨地改名風光近東早水木向南清夏口煙孤起  
湘川雨半晴日煎紅浪拂月射白沙明北渚寒留雁南  
枝暖待鶯駢朱桃露萼點翠柳含萌亥市魚鹽聚神林  
鼓笛鳴壺漿椒葉氣歌曲竹枝聲繫纜憐沙靜垂綸愛  
岸平水餐紅粒稻野茹紫花菁甌泛茶如乳臺粘酒似  
錫膾長抽錦縷藕脆削瓊英容易來千里斯須進一程  
未曾勞氣力漸覺有心情卧穩添春睡行遲帶酒醒忽  
愁牽世網便欲濯塵纓早接文場戰曾爭翰苑盟掉頭

稱俊造翹足取公卿且昧隨時義徒輸報國誠衆排恩  
易失偏壓勢先傾虎尾憂危切鴻毛性命輕燭蛾誰救  
護蠶繭自纏縈斂手辭雙闕回眸望兩京長沙拋賈誼  
漳浦卧劉楨鷓鴣鳴還歇蟾蜍破又盈年光同激箭鄉  
思極搖旌潦倒親知笑哀羸舊識驚烏頭應感白魚尾  
為勞賴劒學將何用丹燒竟不成孤舟萍一葉雙鬢雪  
千莖老見人情盡聞思物理精如湯探冷熱似博鬪輸  
贏險路應須避迷途莫共爭此心知止足何物要經營

玉向泥中潔松經雪後貞無妨隱朝市不必謝寰瀛但  
在前非悟期無後患嬰多知非景福少語是元亨晦即  
全身藥明為伐性兵昏昏隨世俗蠢蠢學黎氓鳥以能  
言繡龜緣入夢烹知之一何晚猶足保餘生

議論與叙事相間而行才氣瀾翻潮湧一筆掃就

題岳陽樓

岳陽城下水漫漫獨上危樓凭曲闌春岸綠時連夢澤  
夕波紅處近長安猿攀樹立啼何苦雁點湖飛渡亦難

此地惟堪畫圖障華堂張與貴人看  
結語振竦洞庭之險更不待實寫

入峽次巴東

不知遠郡何時到猶喜全家此去同  
萬里王程三峽外百年生計一舟中  
巫山暮足霑花雨隴水春多逆浪風  
兩片紅旌數聲鼓使君艘牒上巴東

量移涉險非樂境也中兩聯寫舟行之苦落句偏結得有氣色

容齋隨筆曰杜子美詩夜足霑沙雨春多逆水風樂  
天巫山隴水二句全用之

郡齋暇日憶廬山草堂兼寄二林僧社三十韻皆  
叙貶官以來出處之意

諫諍知無補遷移分所當不堪匡聖主只合事空王龍  
象投新社鵷鷺失故行沉吟辭北闕誘引向西方便住  
雙林寺仍開一草堂平治行道路安置坐禪牀手版支  
為枕頭巾閣在牆先生烏几寫居士白衣裳竟歲何曾



悶終身不擬忙減除殘夢想換盡舊心腸世界多煩惱  
形神久損傷正從風鼓浪轉作日銷霜吾道尋知止君  
恩偶未忘忽蒙頒鳳詔兼謝剖魚章蓮靜方依水葵枯  
重仰陽三車猶夕會五馬已晨裝去似尋前世來如別  
故鄉眉低出鷺嶺脚重下虵岡漸望廬山遠彌愁峽路  
長香鑪峯隱隱巴水字茫茫瓢挂留庭樹經收在屋梁  
春拋紅藥圃夏憶白蓮塘惟擬捐塵事將何答寵光有  
期追永遠無政繼龔黃南國秋猶熱西齋夜暫涼聞吟

四句偈靜對一爐香身老同丘井心空是道場  
覓僧為去伴留俸作歸糧為報山中侶憑看竹下房  
會因歸去在松菊莫教荒

一路順叙熨貼中鍼線細密宛轉幹旋無一毫痕迹  
此種長律正不易得

陰雨

嵐霧今朝重江山此地深灘聲秋更急峽氣曉多陰  
望闕雲遮眼思鄉雨滴心將何慰幽獨賴此北窗琴

送蕭處士遊黔南

能文好飲老蕭郎身似浮雲鬢似霜  
生計拋來詩是業家園忘却酒為鄉  
江從巴峽初成字猿過巫陽始斷腸  
不醉黔中爭去得磨圍山月正蒼蒼  
音節悲涼聞清歌應喚奈何也

竹枝詞四首

瞿塘峽口水煙低白帝城頭月向西  
唱到竹枝聲咽處寒猿閭鳥一時啼

竹枝苦怨怨何人夜靜山空歇又聞蠻兒巴女齊聲唱  
愁殺江樓病使君

巴東船舫上巴西波面風生雨脚齊水蓼冷花紅簇簇  
江蘼溼葉碧淒淒

江畔誰人唱竹枝前聲斷咽後聲遲怪來調苦緣詞苦  
多是通州司馬詩

聲韻悠揚最合竹枝之體

唐汝詢曰冷煙斜月之景竹枝悲咽之聲即寒猿暗

鳥尚不勝情況可使愁人聽之邪

巴水

城下巴江水春來似翅塵軟沙如渭曲斜岸憶天津影  
蘸新黃柳香浮小白蘋臨流搔首坐惆悵為何人

別種東坡花樹兩絕

三年留滯在江城草樹禽魚盡有情何處殷勤重回首  
東坡桃李種新成

花林好住莫顛顚春至但知依舊春樓上明年新太守

不妨還是愛花人

深情達語

別橋上竹

穿橋進竹不依行  
恐礙行人被損傷  
我去自慚遺愛少  
不教君得似甘棠

太平樂詞二首

歲豐仍節儉  
時泰更銷兵  
聖念長如此  
何憂不太平  
湛露浮堯酒  
熏風起舜歌  
願同堯舜意  
所樂在人和

閨怨詞三首

錄二首

珠箔籠寒月，紗窗背曉燈。  
夜來巾上淚，一半是春冰。  
關山征戍遠，閨閣別離難。  
苦戰應顛顚，寒衣不要寬。  
二詩意在言外，有盛唐人遺意。

長洲苑

春入長洲草又生，鷓鴣飛起少人行。  
年深不辨娃宮處，夜夜蘇臺空月明。

憶江柳

曾栽楊柳江南岸一別江南兩度春  
遙憶青青江岸上不知攀折是何人

一氣直下節促而意長

初除主客郎中知制誥與王十一李七元九三舍  
人中書同宿話舊感懷

閒宵靜話喜還悲聚散窮通不自知  
已分雲泥行異路忽驚雞鶴宿同枝  
紫垣曹署榮華地白髮郎官老醜時  
莫怪不如君氣味此中來校十年遲



居易以元和十年貶江州司馬十五年冬自忠州召還  
拜尚書司門員外郎轉主客郎中知制誥在外凡六年  
矣撫今追昔無限感慨悲喜二字為一篇綱領第三句  
悲第四句喜第五句喜第六句悲末二句喜中有悲其  
實悲之意多於喜深厚蘊藉細玩自知居易非沾沾於  
祿位者故曰聚散窮通不自知蓋其安命素矣

見于給事暇日上直寄南省諸郎官詩因以戲贈  
倚作天仙弄地仙誇張一日抵千年黃麻勅勝長生籙

白紵詞嫌內景篇雲彩誤居青瑣地風流合在紫微天  
東曹漸去西垣近鶴駕無妨更著鞭

蔡寬夫詩話曰唐制諫議大夫班給事中上中書舍  
人班又次之然自外入為諫議者歲滿始遷給事中  
歲滿始遷舍人蓋以下為進故有上坡下坡之說樂  
天贈于給事詩雲彩誤居青瑣地四句雖以為戲亦  
當時實事也

西省北院新構小亭種竹開窓東通騎省與李常

侍隔窗小飲因題四韻

結託白鬚伴因依青竹叢題詩新壁上過酒小窗中深  
院晚無日虛檐涼有風金貂醉看好回首紫垣東

蘇軾曰元祐元年予為中書舍人時執政患本省事  
多泄漏欲於舍人廳後作露籬禁同省往來予白諸  
公應須簡要清通何必栽籬插棘諸公笑而止明年  
竟作之暇日讀樂天此詩乃知唐時西掖後作窗以  
通東省而今日本省不得往來可嘆也

送客南遷

我說南中事君應不願聽曾經身困苦不覺語丁寧燒  
處愁雲夢波時憶洞庭春畚煙勃勃秋瘴露冥冥蚊蚋  
經冬活魚龍欲雨腥水蟲能射影山鬼解蔽形穴掉巴  
蛇尾林飄鳩鳥翎颼風千里黑蕪草四時青客似驚弦  
雁舟如委浪萍誰人勸言笑何計慰漂零慎勿琴離膝  
長須酒滿鉶大都從此去宜醉不宜醒

將欲詳說南中之苦而先著君應不願聽五字曲折深

挈中幅鋪叙風土物產末結出送之情此詩與前送  
客遊嶺南同一機局然彼係宦遊故規以不貪此係遷  
謫故進以自遣義各有取爾

方回曰樂天一貶江州司馬移忠州刺史後歸朝為  
中書舍人出知杭州召復為蘇州未嘗遠貶其殆借  
此為題以誇筆端之富妙于鋪叙南土之景歟

舊房

遠壁秋聲蟲絡絲入檐新影月低眉牀帷半故簾旌斷

仍是初寒欲夜時

平平寫景悽然欲絕此種意境非三唐以後所能到

新昌新居書事四十韻因寄元郎中張博士

冒寵已三遷歸朝始二年囊中貯餘俸園外買閒田  
孤兔同三徑蒿萊共一壥新園聊刻穢舊屋且扶顛  
檐漏移傾瓦梁敍換蠹椽平治繞臺路整頓近階  
甃巷狹開容駕牆低壘過肩門閭堪駐蓋堂室可  
鋪筵丹鳳樓當後青龍寺在前市街塵不到官樹  
影相連省吏嫌坊遠

豪家笑地偏敢勞賓客訪或望子孫傳不覓他人愛惟  
將自性便等閒栽樹木隨分占風煙逸致因心得幽期  
遇境牽松聲疑澗底草色勝河邊虛澗冰銷地晴和日  
出天苔行滑如簞莎坐軟於縣簾每當山卷帷多待月  
褰籬東花掩映窓北竹嬋娟迹慕青門隱名慚紫禁仙  
假歸思晚沐朝去戀春眠拙薄才無取疎慵職不專題  
牆書命筆酤酒率分錢柏杵舂靈藥銅餅漱暖泉鑪香  
穿蓋散籠燭隔紗燃陳室何曾埽陶琴不要弦屏除俗

事盡養活道情全尚有妻孥累猶為組綬纏終須拋爵  
祿漸擬斷腥羶大底宗莊叟私心事竺乾浮榮水劃字  
真諦火生蓮梵部經十二玄書字五千是非都付夢語  
默不妨禪博士官猶冷郎中病已痊多同僻處住久結  
靜中緣緩步攜筇杖徐吟展蜀箋老宜閒語話悶憶好  
詩篇蠻榼來方瀉蒙茶到始煎無辭數相見鬢髮各蒼然  
鋪叙新居詩中有畫或議其俚俗瑣碎然不可及處正  
在此入他人手必不能如此詳細過求詳悉必不能如



此位置妥帖竹頭木屑皆非棄物亦顧其用之者何如耳

勤政樓西老柳

半朽臨風樹多情立馬人  
開元一株柳長慶二年春  
不著一字盡得風流

偶題閣下廳

靜愛青苔院深宜白髮翁  
貌將松共瘦心與竹俱空  
暖有低檐日春多颺幕風  
平生閒境界盡在五言中

喜張十八博士除水部員外郎

老何歿後吟聲絕雖有郎官不愛詩無復篇章傳道路  
空留風月在曹司長嗟博士官猶屈亦恐騷人道漸衰  
今日聞君除水部喜於身得省郎時

一氣呵成句句轉筆筆靈章法亦本杜甫不襲其貌而  
得其神故佳宋人如楊廷秀輩有意摹仿此種徒成油  
腔滑調耳

方回曰何遜以詩名老杜頌之曰能詩何水曹張

籍是除樂天賀之五十六字如一直說話自然條暢

晚庭逐涼

送客出門後移牀下砌初趁涼行繞竹引睡卧看書老  
更為官拙慵多向事疎松窗倚藤杖人道似僧居

梨園弟子

白頭垂淚話梨園五十年前雨露恩莫問華清今日事  
滿山紅葉鎖宮門

暮江吟

一道殘陽鋪水中，半江瑟瑟半江紅。  
可憐九月初三夜，露似真珠月似弓。

寫景奇麗，一幅著色秋江圖。

聽彈湘妃怨

玉軫朱絃瑟瑟微，吳娃徵調奏湘妃。  
分明曲裏愁雲雨，

似道蕭蕭郎不歸。

自注：江南新詞有云：暮雨蕭蕭郎不歸。

逢張十八員外籍

旅次正茫茫相逢此道傍晚嵐林葉闇秋露草花香白  
髮江城守青衫水部郎客亭同宿處忽似夜歸鄉

重到江州感舊遊題郡樓十一韻

掌綸知是忝剖竹信為榮才薄官仍重恩深責尚輕昔  
徵從典午今出自承明鳳詔休揮翰漁歌欲濯纓還乘  
小艘艤却到古湓城醉客臨江待禪僧出郭迎青山滿  
眼在白髮半頭生又校三年老何曾一事成重過蕭寺  
宿再上庾樓行雲水新秋思閭閻舊日情郡民猶認得

司馬咏詩聲

全首著意重到二字落句意與神會情景逼真

題別遺愛草堂兼呈李十使君

自注李亦廬山人常隱白鹿洞

曾住鑪峯下書堂對藥臺  
斬新蘿徑合依舊竹窗開  
砌水新開浚池荷手自栽  
五年方整至一宿又須回  
縱未長歸得猶勝不到來  
君家白鹿洞聞道亦生苔

草堂記中有清泉白石實聞斯言之語縱未長歸得二句殆自為解嘲耶

遜叟詩話曰白樂天用斬新亦出杜斬新花藥未應  
飛斬字正形容其新在可解不可解之間

舟中晚起

日高猶掩水窗眠枕簟清涼八月天泊處或依沽酒店  
宿時多伴釣魚船退身江海應無用憂國朝廷自有賢  
且向錢塘湖上去冷吟閒醉二三年

前四句即目之景皆退身無用實事也第六句忽接云  
憂國朝廷自有賢此豈無意於國悻悻然漫諉之他人

者蓋言既不用乞身遠出繫心不忘觸境生感不覺衝口而出既而思之無可如何且惟冷吟閒醉而已命意深厚直與杜甫同調非劉禹錫輩輕薄者所及

晚興

極浦收殘雨高城駐落暉山明虹半出松閣鶴雙歸將吏隨衙散文書入務稀閒吟倚新竹筠粉汙朱衣

夜歸

半醉閒行湖岸東馬鞭敲鐙轡瓏璁萬株松樹青山上



十里沙堤明月中樓角漸移當路影潮頭欲過滿江風  
歸來未放笙歌散畫戟門開蠟燭紅

次聯已盡西湖之景五六從空中摹擬而得潮頭欲過  
滿江風較許渾山雨欲來風滿樓句更為闊大

汪立名曰按西湖蘇白隄相傳二公始築新書亦云  
居易為杭州刺史始築隄捍錢唐湖此公初到杭州  
詩已有十里沙隄句又錢唐湖石函記但云修築河  
隄加高數尺別杭民詩注云增築湖隄築不自公始

明矣或以公詩有綠楊陰裏白沙隄為白隄所自來  
然公詩如護江隄白蹋晴沙亦用白沙不獨湖隄也  
況公所修湖隄在湖之東北接連下湖舊志近昭慶  
有石函橋溜水橋是其故址即李泌設閘洩水引灌  
六井處今杭人率指蘇隄之西為白隄益不相涉又  
有指石徑塘為白隄者不知張祐已有斷橋荒蘚合  
之句矣白詩誰開湖寺西南路草綠裙腰一道斜自  
注云孤山寺在湖洲中草綠時望如裙腰正指今石

徑橋也

臘後歲前遇景詠意

海梅半白柳微黃  
凍水初融日欲長  
度臘都無苦霜霰  
迎春先有好風光  
郡中起晚聽衙鼓  
城上行慵倚女牆  
公事暫閒身且健  
使君殊未厭餘杭

郡齋暇日辱常州陳郎中使君早春晚坐水西館  
書事詩十六韻見寄亦以十六韻酬之

新年多暇日晏起  
寒簾坐睡足心更慵  
日高頭未裹徐

傾下藥酒稍熬煎茶火誰伴寂寥身無絃琴在左遙思  
毘陵館春深物嫋娜波拂黃柳梢風搖白梅朶衙門排  
曉戟鈴閣開朝鎖太守水西來朱衣垂素舸良辰不易  
得嘉會無由果五馬正相望雙魚忽前墮魚中獲瑰寶  
持玩何磊砢一百六十言字字靈珠顆上申心款曲下  
叙時轍軻才富不如君道孤還似我敢辭官遠慢且貴  
身安妥勿復問榮枯冥心無不可

遙思毘陵館至佳會無由果一段先托起一層以下再

叙入寄詩便曲折有致行文最忌直遂詩亦何必不然  
學者參此思過半矣

題小橋前新竹招客

雁齒小紅橋垂檐低白屋橋前何所有萋萋新生竹皮  
開坼褐錦節露抽青玉筠翠如可餐粉霜不忍觸閒吟  
聲未已幽翫心難足管領好風煙輕欺凡草木誰能有  
月夜伴我林中宿為君傾一杯狂歌竹枝曲

筠翠一聯寫得浮筠膩粉光動紙上曲盡新竹姿致

病中逢秋招客夜酌

不見詩酒客卧來半月餘  
合和新藥草尋檢舊方書  
晚霽煙景度早涼窗戶虛  
雪生衰鬢久秋入病心初  
卧簟蘄竹冷風襟叩葛疎  
夜來身校健小飲復何如

洛下卜居

三年典郡歸所得非金帛  
天竺石兩片華亭鶴一隻  
飲啄供稻粱苞裹用茵席  
誠知是勞費其奈心愛惜  
遠從餘杭郭同到洛陽  
陌下擔拂雲根開籠展霜  
翮貞姿不

可雜高性宜其適遂就無塵坊仍求有水宅東南得幽  
境樹老寒泉碧池畔多竹陰門前少人迹未請中庶祿  
且脫雙駝易

自注買履道宅價不足因以兩馬償之

豈獨為身謀安吾鶴

與石

清況可掬却是抒寫真趣非矯語鳴廉也鶴石分承細  
寫一句結足不曰點綴新居而曰安鶴與石妙甚

郡中西園

閒園多芳草春夏香靡靡深樹足佳禽旦暮鳴不已院

門閉松竹庭徑穿蘭芷愛彼池上橋獨來聊徙倚魚依  
藻長樂鷗見人暫起有時舟隨風盡日蓮照水誰知郡  
府內景物閒如此始悟喧靜緣何嘗繫遠邇  
妙諦從心遠地偏悟出

九日宴集醉題郡樓兼呈周殷二判官

前年九日餘杭郡呼賓命宴虛白堂去年九日到東洛  
今年九日來吳鄉兩邊蓬鬢一時白三處菊花同色黃  
一日日知添老病一年年覺惜重陽江南九月未搖落



柳青蒲綠稻穗香姑蘇臺榭倚蒼靄太湖山水含清光  
可憐假日好天色公門吏靜風景涼榜舟鞭馬取賓客  
掃樓拂席排壺觴胡琴錚鏦指撥刺吳娃美麗眉眼長  
笙歌一曲思凝絕金鈿再拜光低昂日脚欲落備燈燭  
風頭漸高加酒漿觥琖豔飛菡萏葉舞鬟擺落茱萸房  
半酣憑檻起四顧七堰八門六十坊遠近高低寺間出  
東西南北橋相望水道脈分棹鱗次里閭綦布城冊方  
人煙樹色無隙罅十里一片青茫茫自問有何才與政

高廳大館居中央銅魚今乃澤國節刺史自古吳都王  
郊無戎馬郡無事門有榮戟腰有章威時儻來合慚媿  
壯歲忽去還感傷從事醒歸應不可使君醉倒亦何妨  
請君停杯聽我語此語真實非虛狂五旬已過不為夭  
七十為期蓋是常須知菊酒登高會從此多無二十場  
以九日起以宴集結中幅鋪叙吳中山水人物城市之  
勝可作圖經

霓裳羽衣歌

自注和  
微之

我昔元和侍憲皇曾陪內宴宴昭陽千歌百舞不可數  
就中最愛霓裳舞舞時寒食春風天玉鉤欄下香案前  
案前舞者顏如玉不著人家俗衣服虹裳霞帔步搖冠  
鈿釵纍纍珮珊珊娉婷似不任羅綺顧聽樂懸行復止  
磬簫箏笛遞相攬擊擲彈吹聲遶迤散序六奏未動衣  
陽臺宿雲慵不飛中序擘騁初入拍秋竹竿裂春冰拆  
飄然轉旋迴雪輕嫣然縱送游龍驚小垂手後柳無力  
斜曳裾時雲欲生煙蛾斂畧不勝態風袖低昂如有情

上元點鬟招萼綠王母揮袂別飛瓊繁音急節十二遍  
跳珠撼玉何鏗錚翔鸞舞了却收翅喚鶴曲終長引聲  
當時乍見驚心目凝視諦聽殊未足一落人間八九年  
耳冷不曾聞此曲湓城但聽山魃語巴峽惟聞杜鵑哭  
移領錢塘第二年始有心情問絲竹玲瓏篴篥謝好箏  
陳寵膚栗沈平笙清絃脆管纖纖手教得霓裳一曲成  
虛白亭前湖水畔前後祇應三度按便除席子拋却來  
聞道如今各星散今年五月至蘇州朝鐘暮角催白頭

貪看案牘常侵夜不聽笙歌直到秋  
秋來無事多閒悶  
忽憶霓裳無處問  
聞君部內多樂徒  
問有霓裳舞者無  
答云七縣十萬戶  
無人知有霓裳舞  
惟寄長歌與我來  
題作霓裳羽衣譜  
四幅花牋碧間紅  
霓裳實錄在其中  
千姿萬狀分明見  
恰與昭陽舞者同  
眼前髣髴覩形質  
昔日今朝想如一  
疑從魂夢呼召來  
似著丹青圖寫出  
我愛霓裳君合知  
發於歌詠形於詩  
君不見我歌云驚  
破霓裳羽衣曲  
又不見我詩云  
曲愛霓裳未拍時  
由來

能事皆有主楊氏創聲君造譜君言此舞難得人須是  
傾城可憐女吳妖小玉飛作煙越豔西施化為土嬌花  
巧笑久寂寥娃館苧蘿空處所如君所言誠有是君試  
從容聽我語若求國色始翻傳但恐人間廢此舞妍蚩  
優劣寧相遠大都只在人擡舉李娟張態君莫嫌亦擬  
隨宜且教取

我昔元和侍憲皇至喉鶴曲終長引聲叙霓裳羽衣之  
節奏聲容也當時乍見驚心目至聞道如今各星散叙

自己之仕途遷移而選伎以教霓裳也今年五月至蘇州至似著丹青圖寫出叙微之之寄霓裳羽衣譜也我愛霓裳君合知至末以和詩意作結而言此舞之不可失其傳也曰就中最愛霓裳舞教得霓裳一曲成無人知有霓裳舞恰與昭陽舞者同但恐人間廢此舞叙次分明層層照應可當一篇霓裳羽衣記情致纏綿往復極一唱三歎之妙

夢溪筆談曰葉法善引明皇入月宮聞仙樂及上歸

但記其半遂於笛中寫之會西涼府都督楊敬述進  
婆羅門曲與其聲調相符遂以月中所聞為散序用  
敬述所進為其腔而名霓裳羽衣曲其說出鄭嵎津  
陽門詩注與公自注不同又蒲州逍遙樓楯上有唐  
人橫書類梵字相傳是霓裳譜字訓不通莫知是非  
或謂今燕部有獻仙音曲乃其遺聲然霓裳本謂之  
道調法曲今獻仙音乃小石調耳未知孰是

韻語陽秋曰霓裳羽衣舞始於開元盛於天寶今寂



不傳矣賴有白詩可見一二爾虹裳二句言所飾之  
服也散序二句及繁音二句言所奏之曲也而唐會  
要謂破陣樂赤白桃李花望瀛霓裳羽衣總名法曲  
今世所傳望瀛亦十二徧散序無拍曲終亦長引聲  
若樂奏望瀛亦可髣髴其遺意云

小童薛陽陶吹簫栗歌

自注和浙西  
李大夫作

剪削乾蘆插寒竹九孔漏聲五音足近來吹者誰得名  
闕瑾老死李衮生衮今又老誰其嗣薛氏樂童年十二

指點之下師授聲含嚼之間天與氣潤州城高霜月明  
吟霜思月欲發聲山頭江底何悄悄猿聲不喘魚龍聽  
翕然聲作疑管裂訕然聲盡疑刀截有時婉軟無筋骨  
有時頓挫生稜節急聲員轉促不斷轆轤轆轤似珠貫  
緩聲展引長有條有條直直如筆描下聲乍墜石沉重  
高聲忽舉雲飄蕭明旦公堂陳宴席主人命樂娛賓客  
碎絲細竹徒紛紛宮調一聲雄出羣衆音颺縷不落道  
有如部伍隨將軍嗟爾陽陶方穉齒下手發聲已如此

若教白頭吹不休但恐聲名壓關李

全是摹老杜觀舞劒器行而變化出之筆力峭勁詞意奇警在集又高一格

汪立名曰按李德裕有霜夜對月聽小童陽陶吹簫栗歌羅隱詩平泉上相東征日曾為陽陶吹簫栗吳江太守會稽侯相次三篇皆俊逸太守謂公會稽侯謂元也然元相集中已失此詩

桂苑叢談曰咸通中姑臧公自梁移鎮淮海郡寡勝

遊之地且風亭月觀既已荒涼於戲馬臺連玉鉤道  
開板池治建亭臺既畢號曰賞心有浙右小校薛陽  
陶監押度支運米入城公喜其姓名試詢之果是舊  
人及問往日蘆管之事有朱崖陸暢元白所撰歌篇  
一軸公益喜之以蘆管奏於茲亭其管絕微每一簞  
栗管中常容三管聲聲如天際自然來云

雙石

蒼然兩片石厥狀怪且醜俗用無所堪時人嫌不取結

從胚渾始得自洞庭口萬古遺水濱一朝入吾手擔舁  
來郡內洗刷去泥垢孔黑煙痕深罅青苔色厚老蛟蟠  
作足古劒插為首忽疑天上落不似人間有一可支吾  
琴一可貯吾酒峭絕高數尺坳泓容一斗五絃倚其左  
一杯置其右窪樽酌未空玉山頽已久人皆有所好物  
各求其偶漸恐少年場不容垂白叟迴頭問雙石能伴  
老夫否石雖不能言許我為三友

觸手明通遊戲自在此種詩境開自居易而蘇軾效之

軾集中楊康功石一首本此

和微之四月一日作

四月一日天花稀葉陰薄  
泥新燕影忙  
蜜熟蠶聲樂  
麥風低冉冉  
稻水平漠漠  
芳節或蹉跎  
遊心稍牢落  
春華信為美  
夏景亦未惡  
颭浪嫩青荷  
重欄晚紅藥  
吳宮好風月  
越郡多樓閣  
兩地誠可憐  
其奈久難索

喜雨

圃旱憂葵堇  
農旱憂禾菽  
人各有所私  
我旱憂松竹  
松

乾竹焦死蒼蒼在心目灑葉溉其根汲水勞僮僕油雲  
忽東起涼雨淒相續似面洗垢塵如頭得膏沐千柯習  
習潤萬葉欣欣綠千日澆灌功不如一霖霖方知宰生  
靈何異活草木所以聖與賢同心調玉燭

千日澆灌功不如一霖霖口頭尋常語却是至理喜字  
意纔寫得盡末四句推廣言之小中見大蓋濟人利物  
之心無時或忘也

六年春贈分司東都諸公

時為河  
南尹

我為同州牧內媿無才術忝擢恩已多遭逢幸非一偶  
當穀賤歲適值民安日郡縣獄空虛鄉閭盜奔逸其間  
最幸者朝客多分秩行接鴛鴦羣坐成芝蘭室時聯拜  
表騎間動題詩筆夜雪秉燭遊春風攜榼出花教鶯點  
檢柳付風排比法酒澹清漿含桃嫋紅實洛童調金管  
盧女鏗瑤瑟黛慘歌思深腰凝舞拍密每因同醉樂自  
覺忘哀疾始悟肘後方不如杯中物生涯隨日過世事  
何時畢老子苦乖慵希君數牽率



偶當穀賤歲四句先將境內承平之況吏治之善特筆  
提寫以下接入宴遊之樂便自不妨此其所以可幸也  
儻四境不治而從事宴遊是曠官也方自媿之不暇何  
以幸為韋應物詩云邑有流亡媿俸錢與此作兩得之  
矣

和微之詩二十三首

并序

錄三首

微之又以近作二十三首寄來命僕繼和其間瘀絮  
四百字車斜二十篇者流皆韻劇辭殫瓌奇怪謫又

題云奉煩只此一度乞不見辭意欲定霸取威置僕  
於窮地耳大凡依次用韻韻同而意殊約體為文  
成而理勝此足下素所長者僕何有焉今足下果用  
所長過蒙見窘然敵則氣作急則計生四十二章魔  
婦並畢不知大敵以為何如夫斲石破山先觀鑿迹  
發矢中的兼聽弦聲以足下來章惟求相困故老僕  
報語不覺大誇況曩者唱酬近來因繼已十六卷凡  
千餘首矣其為敵也當今不見其為多也從古未聞

所謂天下英雄惟使君與操耳戲及此者亦欲三千  
里外一破愁顏勿示他人以取笑諠樂天白

和三月三十日四十韻

送春君何在君在山陰署憶我蘇杭時春遊亦多處為  
君歌往事豈敢辭勞慮莫怪言語狂須知酬答遽江南  
臘月半水凍疑如瘵寒景尚蒼茫和風已吹噓女牆城  
似竈雁齒橋如鋸魚尾上簷淪草芽生沮洳律遲太簇  
管日暖羲和馭布澤木龍催迎春土牛助雨師習習灑

雲將飄飄翥四野萬里晴千山一時曙杭土麗且康蘇  
民富而庶善惡有懲勸剛柔無吐茹兩衙少辭牒四境  
稀書疏俗以勞來安政因閒暇著仙亭日登眺虎丘時  
遊豫尋幽駐旌軒選勝迴賓御舟移溪鳥避樂作林猿  
覩池古莫邪沈石奇羅剎踞水苗泥易耨畬粟灰難鉏  
紫蕨抽出畦白蓮埋在淤菱花紅帶黯溼葉黃含菸鏡  
動波颭菱雪迴風旋絮手經攀桂馥齒為嘗梅楚坐并  
船脚鼓行多馬蹄踰聖賢清濁醉水陸鮮肥飫魚膾芥

醬調水葵鹽豉絮雖微五袴歌幸免兆人詛但令樂不  
荒何必遊無倨吳苑僕尋罷越城公尚據舊遊幾客存  
新宴誰人與莫空文舉酒強下何曾箸江上易優游城  
中多毀譽分應當自盡事勿求人恕我既無子孫君仍  
畢婚娶久為雲雨別終擬江湖去范蠡有扁舟陶潛有  
藍輦兩心苦相憶兩口遙相語最恨七年春春來各一  
處

和韻奇險正自章妥句適寫景歷歷如畫引入人入勝但

令樂不荒何必遊無侶分應當自盡事勿求人恕尤見  
道之語

和酬鄭侍御東陽春悶放懷追越遊見寄

君得嘉魚置賓席樂如南有嘉魚時勁氣森爽竹竿疎  
妍文煥爛芙蓉披載筆在幕名已重補袞於朝官尚卑  
一緘疏入掩谷永三都賦成排左思自言拜辭主人後  
離心蕩颺風前旗東南門館別經歲春眼悵望秋心悲  
自注已上  
叙嘉魚  
昨日嘉魚來訪我方駕同出何所之樂遊原

頭春尚早百舌新語聲裊裊日趁花忙向南坼風催柳  
急從東吹流年愀怛不饒我美景鮮妍來為誰紅塵三  
條界阡陌碧草千里鋪郊畿餘霞斷時綺幅裂斜雲展  
處羅文紕暮鐘遠近聲互動暝鳥高下飛追隨酒酣將  
歸未能去悵然迴望天四垂生何足養嵇著論途何足  
泣楊漣湏胡不花下伴春醉滿酌綠酒聽黃鸝嘉魚點  
頭時一歎聽我此言不知疲語終興盡各分散東西軒  
騎分逶迤此詩勿遣閒人見見恐與他為笑資白首舊

寮知我者憑君一詠向周師

自注周判官師範蘇杭  
舊判官去範字叶韻

整嚴疎宕七古正則

和順之琴者

陰陰花院月耿耿蘭房燭中有弄琴人聲貌俱如玉清  
冷石泉引雅澹風松曲遂使君子心不愛凡絲竹

御選唐宋詩醇卷二十四



欽定四庫全書

御選唐宋詩醇卷二十五

太原白居易詩七

目錄

秋池二首

中隱

葦池上舊亭

翫止水

聞崔十八宿予新昌敝宅時予亦宿崔家依仁新  
亭一宵偶同兩興暗合因而成詠聊以寫懷

池上夜境

遊坊口懸泉偶題石上

詠興五首

錄三首

出府歸吾廬

池上有小舟

四月池水滿

秋涼閒卧

代鶴

立秋夕有懷夢得

秋日與張賓客舒著作同遊龍門醉中狂歌凡二

百三十八字

南池早春有懷

北窗三友

裴侍中晉公以集賢林亭即事詩二十六韻見贈

猥蒙徵和才拙詞繁輒廣為五百言以伸酬獻

晚歸香山寺因詠所懷

洛陽有愚叟

閒居自題

菩提寺上方晚望香山寺寄舒員外

小臺

池上作

小閣閒坐

遊平泉宴浥澗宿香山石樓贈座客

和夢得洛中早春見贈七韻

李盧一中丞各創山居俱誇勝絕然去城稍遠來  
往頗勞敝居新泉實在宇下偶題十五韻聊戲二  
君

夢上山

錢塘湖春行

西湖晚歸回望孤山寺贈諸客

杭州春望

湖亭晚歸

孤山寺遇雨

餘杭形勝

江樓夕望招客

江樓晚眺景物鮮奇吟翫成篇寄水部張籍員外

晚興

春題湖上

別州民

西湖留別

答微之誇越州州宅

酬微之

微之整集舊詩及文筆為百軸以七言長句寄樂  
天樂天次韻酬之餘思未盡加為六韻

答微之見寄

得湖州崔十八使君書喜與杭越隣郡因成長句

代賀兼寄微之

贈侯三郎中

履道新居二十韻

夢行簡

渡淮

自到郡齋僅經旬日方專公務未及宴遊偷閒走  
筆題二十四韻兼寄常州賈舍人湖州崔郎中仍  
呈吳中諸客



故衫

泛太湖書事寄微之

病中多雨逢寒食

重答劉和州

城上夜宴

六月三日夜聞蟬

晚起

河亭晴望

夢蘇州水閣寄馮侍御

太湖石

秘省後廳

寄殷協律

臨都驛答夢得六言二首

春詞

送敏中歸幽寧幕

池窗

送鶴與裴相臨別贈詩

烏夜啼

送東都留守令狐尚書赴任

想東遊五十韻

將至東都先寄令狐留守

晚桃花

阿崔



欽定四庫全書

御選唐宋詩醇卷二十五

太原白居易詩七

秋池二首

身閒無所為心閒無所思  
況當故園夜復此新秋  
池岸間鳥栖後橋明月出時  
菱風香散漫桂露光參差  
靜境多獨得幽懷竟誰知  
悠然心中語自問來何遲

朝衣薄且健晚簟清仍滑  
社近燕影稀雨餘蟬聲歇  
閒

中得詩境此境幽難說露荷珠自傾風竹玉相戛誰能  
一同宿共翫新秋月暑退早涼歸池邊好時節

中隱

大隱住朝市小隱入丘樊丘樊太冷落朝市大囂諠不  
如作中隱隱在留司官似出復似處非忙亦非閒不勞  
心與力又免饑與寒終歲無公事隨月有俸錢君若好  
登臨城南有秋山君若愛遊蕩城東有春園君若欲一  
醉時出赴賓筵洛中多君子可以恣歡言君若欲高卧

但自深掩關亦無車馬客造次到門前  
人生處一世其道難兩全  
賤即苦凍餒貴則多憂患  
唯此中隱士致身吉且安  
窮通與豐約正在四者間  
胸中無罣礙乃得此空明灑脫之境

葦池上舊亭

池月夜淒涼池風曉蕭颯  
欲入池上冬先葦園中間向  
暖窗戶開迎寒簾幕合苔封舊瓦木水照新朱蠟軟火  
深土爐香醪小瓷盞中有獨宿翁一燈對一榻

翫止水

動者樂流水靜者樂止水利物不如流鑒形不如止淒  
清早霜降浙瀝微風起中面紅葉開四隅綠萍委廣狹  
八九丈灣環有涯涘淺深三四尺洞徹無表裏淨分鶴  
翹足澄見魚掉尾迎眸洗眼塵隔胃蕩心滓定將禪不  
別明與誠相似清能律貪夫澹可交君子豈唯空狎翫  
亦取相倫擬欲識靜者心心源只如此

見理透體物精晉人無此分寸宋人無此灑脫



聞崔十八宿予新昌敝宅時予亦宿崔家依仁新  
亭一宵偶同兩興暗合因而成詠聊以寫懷

陋巷掩敝廬高居敞華屋新昌七株松依仁萬莖竹松  
前月臺白竹下風池綠君向我齋眠我在君亭宿平生  
有微尚彼此多幽獨何必本主人兩心聊自足

池上夜境

晴空星月落池塘澄鮮淨綠表裏光露簟清瑩迎夜滑  
風襟瀟灑先秋涼無人驚處野禽下新睡覺時幽草香

但問塵埃能去否濯纓何必問滄浪

遊坊口懸泉偶題石上

自注時為河南尹

濟源山水好老尹知之久常日聽人言今秋入吾手  
孔山刀劍立沁水龍蛇走危磴上懸泉澄灣轉坊口虛明  
見深底淨綠無纖垢仙擢浪悠揚塵纓風斗數巖寒松  
栢短石古莓苔厚錦座纓高低翠屏張左右雖無安石  
妓不乏文舉酒談笑逐身來管絃隨事有時逢杖錫客  
或值垂綸叟相與澹忘歸自辰將及酉公門欲返駕溪

路猶迴首早晚重來遊心期罷官後

中幅刻畫山水景致頗近選體起結香山本色

詠興五首

井序

錄三首

七年四月予罷河南府歸履道第廬舍自給衣儲自  
充無欲無營或歌或舞頽然自適蓋河洛間一幸人  
也遇興發詠偶成五章各以首句命為題目

出府歸吾廬

出府歸吾廬靜然安且逸更無客干謁時有僧問疾家

僮十餘人，檣馬三四匹，慵發經旬，卧興來連日出遊。  
愛何處，嵩碧伊瑟瑟，況有清和天。正當疎散日，身閒自  
為貴，何必居榮秩。心足即非貧，豈唯金滿室。吾觀權勢  
者，苦以身徇物。炙手外炎炎，履冰中慄慄。朝飢口忘味，  
夕惕心憂失。但有富貴名，而無富貴實。

胸有真得信，手拈來自饒。天趣此種詩境的是，從淵明  
脫化而出，但不無繁簡。古近之別，必以字句形迹求之，  
是耳食之見也。

池上有小舟

池上有小舟舟中有胡牀牀前有新酒獨酌還獨嘗熏  
若春日氣皎如秋水光可洗機巧心可蕩塵垢腸岸曲  
舟行遲一曲進一觴未知幾曲醉醉入無何鄉黃緣潭  
島間水竹深青蒼身閒心無事白日為我長我若未忘  
世雖閒心亦忙世若未忘我雖退身難藏我今異于是  
身世交相忘

四月池水滿

四月池水滿龜游魚躍出吾亦愛吾池池邊開一室人  
魚雖異族其樂歸于一且與爾為徒逍遙同過日爾無  
羨滄海蒲藻可委質吾亦忘青雲衡茅足容膝況吾與  
爾輩本非蛟龍匹假如雲雨來祇是池中物

會心不遠熟讀蒙莊方有此悟境

秋涼閒卧

殘暑晝猶長早涼秋尚嫩露荷散清香風竹含疎韻幽  
閒竟日卧衰病無人問薄暮宅門前槐花深一寸

嫩字奇當是從秋老想出却從未經人道

代鶴

我本海上鶴偶逢江南客感君一顧恩同來洛陽陌洛  
陽寡族類皎皎唯兩翼貌是天與高色非日浴白主人  
誠可戀其奈軒庭窄飲啄雜雞羣年深損標格故鄉渺  
何處雲水重重隔誰念深籠中七換摩天翻  
比意深遠

立秋夕有懷夢得

露簾荻竹青風扇蒲葵輕一與故人別再見新蟬鳴是  
夕涼颼起閒境入幽情迴燈見棲鶴隔竹聞吹笙夜茶  
一兩杓秋吟三數聲所思渺千里雲水長洲城

琢句清雅似王維

秋日與張賓客舒著作同遊龍門醉中狂歌凡二  
百三十八字

秋天高高秋光清秋風嫋嫋秋蟲鳴嵩峯餘霞錦綺卷  
伊水細浪鱗甲生洛陽閒客知無數少出遊山多在城



商嶺老人自追逐蓬丘逸士相逢迎南出鼎門十八里  
莊店邈迤橋道平不寒不熱好時節鞍馬穩慢衣衫輕  
並轡跼蹐下西岸扣舷容與繞中汀開懷曠達無所繫  
觸目勝絕不可名荷衰欲黃荇猶綠魚樂自躍鷗不驚  
翠藻蔓長孔雀尾彩船櫓急寒雁聲家醞一壺白玉液  
野花數把黃金英晝遊四看西日暮夜話三及東方明  
暫停杯觴輟吟詠我有狂言君試聽丈夫一生有二志  
兼濟獨善難得并不能救療生民病即須洗濯塵土纓

況吾頭白眼已暗終日戚促何所成不如展眉開口笑  
龍門醉臥香山行

南池早春有懷

朝遊北橋上晚憩南塘畔西日雪全銷東風冰盡泮  
篴魚尾掉瞥瞥鵝毛換泥暖草芽生沙虛泉脈散晴芳  
冒苔島宿潤侵蒲岸洛下日初長江南春欲半時光共  
拋擲人事堪嗟歎倚擢忽尋思去年池上伴

妙于體物息心靜觀得之

北窗三友

今日北窗下自問何所為欣然得三友三友者為誰琴  
罷輒舉酒酒罷輒吟詩三友遞相引循環無已時一彈  
愜中心一詠暢四肢猶恐中有間以醉彌縫之豈獨吾  
拙好古人多若斯嗜詩有淵明嗜琴有啓期嗜酒有伯  
倫三人皆吾師或乏簪石儲或穿帶索衣絃歌復觴詠  
樂道知所歸三師去已遠高風不可追三友遊甚熟無  
日不相隨左擲白玉卮右拂黃金徽興酣不疊紙走筆

操狂詞誰能持此詞為我謝親知縱未以為是豈以我  
為非

猶恐中有間以醉彌縫之濁醪妙理如是正從三日不  
飲覺形神不復相親語化出有三友便有三師涉筆成  
趣

裴侍中晉公以集賢林亭即事詩二十六韻見贈  
猥蒙徵和才拙詞繁輒廣為五百言以伸酬獻

三江路千里五湖天一涯何如集賢第中有平津池池

勝主見覺景新人未知竹森翠琅玕水深洞琉璃水竹  
以為質質立而文隨文之者何人公來親指麾疏鑿出  
人意結構得地宜虛襟一搜索勝槩無遁遺因下張沼  
沚依高築階基嵩峰見數片伊水分一支南溪修且直  
長波碧逶迤北館壯復麗倒影紅參差東島號晨光杲  
曜迎朝曦西嶺名夕陽杳曖留落暉前有水心亭動蕩  
架漣漪後有開闔堂寒溫變天時幽泉鏡泓澄怪石山  
敝危春葩雪漠漠夏果珠離離主人命方舟宛在水中

抵親賓次第至酒樂前後施解纜始登汎山遊仍水嬉  
沿洄無滯礙向背窮幽奇瞥過遠橋下飄旋深澗陁管  
絃去縹緲羅綺來霏微擢風逐舞迴梁塵隨歌飛宴餘  
日云暮醉客未放歸高聲索彩牋大笑催金卮唱和筆  
走疾問答杯行遲一詠清兩耳一酣暢四肢主客忘貴  
賤不知俱是誰客有詩魔者吟哦不知疲乞公殘紙墨  
一掃狂歌詞維公社稷臣赫赫文武姿十授丞相印五  
建大將旗四朝致勛華一身冠皐夔去年才七十決赴

懸車期公志不可奪君恩亦難違從容就中道俛僊來  
保釐貂蟬雖未脫鸞鳳已不羈歷徵今與古獨步無等  
夷陸賈功業少二疏官秩卑乘舟范蠡懼辟穀留侯飢  
豈若公今日身安家國肥羊祜在漢南空留峴首碑柳  
惲在江南祇賦汀洲詩謝安入東山但說攜蛾眉山簡  
醉高陽唯聞倒接離豈如公今日餘力兼有之願公壽  
如山安樂長在茲願我比蒲稗永得相因依

三江路千里至夏果珠離離詳叙林亭結構之勝公來

親指麾五句特筆提寫平章風月行所無事是大作用  
人間中經濟也主人命方舟至不知俱是誰極言宴飲  
之樂客有詩魔者至鸞鳳已不羈入到自己歷叙裴之  
功名出處數行一筆寫出歷徵今與古至餘力兼有之  
又歷舉古人作襯見其兼有衆美願公壽如山四句以  
祝頌意作結洋洋大篇一氣呵成又復莊重得體真絕  
大手筆亦惟度足以當之

新唐書裴度傳度治第東都集賢里沼石林叢岑繚



幽勝午橋作別墅具燠館涼臺號綠野堂漱波其下  
度野服蕭散與白居易劉禹錫為文章把酒窮晝夜  
相歡不問人間事

晚歸香山寺因詠所懷

我年日已老我身日已閒閒出都門望但見水與山關  
塞碧巖巖伊流清潺潺中有古精舍軒戶無扃關岸草  
歇可藉徑蘿行可攀朝隨浮雲出夕與飛鳥還吾道本  
迂拙世途多險艱嘗聞嵇呂輩尤悔生疎頑巢悟入箕

賴皓知返商巔豈唯樂肥遯聊復祛憂患吾亦從此去  
終老伊嵩間

劇談錄曰樂天為少傅分務洛師情興高逸盧尚書  
簡辭有別墅近枕伊水冬日與羣從子姪同游倚欄  
眺嵩洛俄而霰雪微下情興益高因話廉察金陵常  
記江南煙水每見居人以葉舟浮泛就食菰米鱸魚  
近來思之如在心目良久忽見二人衣簑笠循岸而  
來牽引蓬艇船頭覆青幕中有白衣人與衲僧偶坐

船後有小竈安桐甑卅角童煮茗汴流過于檻前舟  
中吟嘯方酣問之乃是白傳與僧佛光自建春門往  
香山精舍此一段可謂天然圖畫

洛陽有愚叟

洛陽有愚叟白黑無分別浪迹雖似狂謀身亦不拙點  
檢盤中飯非精亦非糲點檢身上衣無餘亦無闕天時  
方得所不寒復不熱體氣正調和不飢仍不渴閒將酒  
壺出醉向人家歇野食或烹鮮寓眠多擁褐抱琴榮啓

樂荷鋪劉伶達放眼看青山任頭生白髮不知天地內  
更得幾年活從此到終身盡為閒日月

茗溪漁隱曰放眼看青山任頭生白髮其趣放如此  
閒居自題

門前有流水牆上多高樹竹徑繞荷池縈迴百餘步  
閒戲魚鼈風靜下鷗鷺寂無城市喧渺有江湖趣吾廬  
在其上偃臥朝復暮洛下安一居山中亦慵去時逢過  
客愛問是誰家住此是白家翁閉門終老處

菩提寺上方晚望香山寺寄舒員外

晚登西寶刹晴望東精舍  
反照轉樓臺輝輝似圖畫  
氷浮水明滅雪壓松偃亞  
石閣僧上來雲汀雁飛下  
西京開于市東洛閒如社  
曾憶舊遊無香山明月夜  
真畫景畫家却無下筆處

小臺

新樹低如帳小臺平似掌  
六尺白藤牀一莖青竹杖  
風飄竹皮落苔印鶴迹上  
幽境與誰同閒人自來往

似王亦似韋

池上作

自注西溪南潭  
皆池中勝處也

西溪風生竹森森南潭萍開水沉沉  
叢翠萬竿相岸色空碧一泊松江心  
浦派縈迴誤遠近橋島向背迷登臨  
澄瀾方丈若萬頃倒影咫尺如千尋  
泛然獨遊邈然坐坐念行心思古今  
菟裘不聞有泉沼西河亦恐無雲林  
豈如白翁退老地樹高竹密池塘深  
華亭雙鶴白矯矯太湖四石青岑岑  
眼前盡日更無客鄰上此時惟有琴

洛陽冠蓋自相索誰肯來此同抽簪

小閣閒坐

閣前竹蕭蕭閣下水潺潺拂簾卷簾坐清風生其間靜  
聞新蟬鳴遠見飛鳥還但有巾挂壁而無客叩關二疏  
返故里四老歸舊山吾亦適所願求閒而得閒  
起四句颯然而來紙上有聲

遊平泉宴浥澗宿香山石樓贈座客

逸少集蘭亭李倫宴金谷金谷太繁華蘭亭闕絲竹何

如今日會浥澗平泉曲杯酒與管絃貧中隨分足紫鮮  
林筍嫩紅潤園桃熟采摘助盤筵芳滋盈口腹閒吟暮  
雲碧醉藉春草綠舞妙豔流風歌清叩寒玉古詩惜晝  
短勸我令秉燭是夜勿言歸相攜石樓宿

和夢得洛中早春見贈七韻

衆皆賞春色君獨憐春意春意竟如何老夫知此味燭  
餘減夜漏衾暖添朝睡恬和臺上風虛潤池邊地開蓬  
花養艷語嬾鶯含思似訝隔年齋如勸迎春醉何日同



宴遊心期二月二

自注此日出齋故云

開遲花養艷語嬾鶯含思十字刻畫工絕寫春意變虛  
為實尤奇

李盧二中丞各創山居俱誇勝絕然去城稍遠來

往頗勞敝居新泉實在宇下偶題十五韻聊戲二

君

龍門蒼石壁

李所有也

浥澗碧潭水

盧所有也

各在一山隅迢迢

幾十里清鏡碧屏風惜哉信為美愛而不得見亦與無

相似聞君每來去  
矻矻事行李  
脂轄復裹糧  
心力頗勞止  
未如吾舍下石與泉甚  
通鑿鑿復濺濺  
晝夜流不已  
洛石千萬拳  
襯波鋪錦綺  
海珉一兩片  
激瀨含宮徵  
綠宜春濯足  
淨可朝漱齒  
繞砌紫鱗游  
拂簾白鳥起  
何言履道叟  
便是滄浪子  
君若趁歸程  
請君先到此  
願以潺湲聲洗君塵土耳

夢上山

自注時足疾未平

夜夢上嵩山  
獨攜藜杖出千巖  
與萬壑  
遊覽皆周畢  
夢

中足不病健似少年日既悟神返初依然舊形質始知  
形神內形病神無疾形神兩是幻夢寐俱非實晝行雖  
蹇澀夜步頗安逸晝夜既平分其間何得失

一片悟境形病神無疾五字尤有至理

錢塘湖春行

孤山寺北賈亭西水面初平雲脚低幾處早鶯爭暖樹  
誰家新燕啄春泥亂花漸欲迷人眼淺草纔能沒馬蹄  
最愛湖東行不足綠楊陰裏白沙堤

西湖晚歸回望孤山寺贈諸客

柳湖松島蓮花寺，晚動歸桡出道場。  
盧橘子低山雨重，棕櫚葉戰水風涼。  
煙波澹蕩搖空碧，樓殿參差倚夕陽。  
到岸請君回首望，蓬萊宮在海中央。

句法挺健，由字法生新也。重字戰字搖字倚字俱下得。  
警拔遂覺全首生動。故曰鍊句不如鍊字。

杭州春望

望海樓明照曙霞，護江隄白蹋晴沙。  
濤聲夜入伍員廟，

柳色春藏蘇小家紅袖織綾誇柿蒂青旗酤酒趁梨花  
誰開湖寺西南路草綠裊腰一道斜

入字藏字極寫望中之景落句結足春意

汪立名曰按能改齋漫錄云劉次莊樂府解題曰錢  
塘蘇小歌蘇小非唐人世見樂天夢得詩多稱詠遂  
謂之同時耳按郭茂倩所編引廣題曰蘇小小錢塘  
名娼也蓋南齊時人西陵在錢塘江之西故古詞云  
何處結同心西陵松柏下

湖亭晚歸

盡日湖亭臥心閒事亦稀起因殘醉醒坐待晚涼歸松  
雨飄藤帽江風透葛衣柳堤行不厭沙軟絮霏霏

孤山寺遇雨

拂波雲色重灑葉雨聲繁水鷺雙飛起風荷一向翻空  
濛連北岸蕭颯入東軒或擬湖中宿留船在寺門

餘杭形勝

餘杭形勝四方無州傍青山縣枕湖繞郭荷花三十里

拂城松樹一千株夢兒亭古傳名謝教妓樓新道姓蘇  
獨有使君年太老風光不稱白髭鬚

江樓夕望招客

海天東望夕茫茫山勢川形濶復長燈火萬家城四畔  
星河一道水中央風吹古木晴天雨月照平沙夏夜霜  
能就江樓銷暑否比君茅舍校清涼

高瞻遠矚坐馳可以役萬景他人有此眼力無此筆力  
江樓晚眺景物鮮奇吟翫成篇寄水部張籍員外

澹煙疎雨間斜陽江色鮮明海氣涼蜃散雲收破樓閣  
虹殘水照斷橋梁風翻白浪花千片雁點青天字一行  
好著丹青圖畫取題詩寄與水曹郎

起句便是極好畫景中四句四面摹寫總為鮮明二字  
設色落句以圖畫結足歸到寄詩之意篇法極緊

晚興

草淺馬翩翩新晴薄暮天柳條春拂面衫袖醉垂鞭立  
語花隄上行吟水寺前等閒消一日不覺過三年



春題湖上

湖上春來似畫圖  
亂峯圍繞水平鋪  
松排山面千重翠  
月點波心一顆珠  
碧毯線頭抽早稻  
青羅帟帶展新蒲  
未能拋得杭州去  
一半勾留是此湖

畫圖二字是詩眼下五句皆實寫畫圖中景以不舍意作結而曰一半勾留言外正有餘情

別州民

耆老遮歸路  
壺漿滿別筵  
甘棠無一樹  
那得淚潛然  
稅

重多貧戶農饑足旱田唯留一湖水與汝救凶年

今春增築

錢塘湖堤貯水以防天旱故云

後四句經濟政績具見其中慈惠之意藹然言表必如此留心民事方許詩酒遊遨彼長日惟消一局棋者那得借口風流也

西湖留別

征遶行色慘風煙祖帳離聲咽管絃翠黛不須留五馬  
皇恩只許住三年綠藤陰下鋪歌席紅藕花中泊妓船

處處回頭盡堪戀就中難別是湖邊

答微之誇越州州宅

賀上人回得報書大誇州宅似仙居  
厭看馮翊風沙久喜見蘭亭煙景初  
日出旌旗生氣色月明樓閣在空虛  
知君暗數江南郡除却餘杭盡不如

中二聯叙越州風景微之所誇也結句戲以折之樂天  
自誇也

酬微之

自注微之題云郡務稍簡因得整集舊詩  
并連綴刪削封章諫草繁委箱笥僅喻百

欽定四庫全書

卷二十五

軸偶成自數  
兼寄樂天

滿裘填箱唱和詩少年為戲老成悲  
聲聲麗曲敲寒玉  
句句妍辭綴色絲  
吟翫獨當明月夜  
傷嗟同是白頭時  
由來才命相磨折  
天遣無兒欲怨誰

自注微之句云天遣兩家無嗣子欲

將文字付誰人  
故以此答之

陸龜蒙有云淫畋漁者謂之暴天物  
天物且不可暴人  
可抉摘削露其情狀乎  
天能不致罰耶  
長吉天東野窮  
玉溪生官不挂朝籍而死正坐是哉  
由此觀之元白之

無後未必非天之致罰也玩落句意香山其自知之矣  
微之整集舊詩及文筆為百軸以七言長句寄樂  
天樂天次韻酬之餘思未盡加為六韻

海內聲華併在身篋中文字絕無倫遙知獨對封章草  
忽憶同為獻納臣走筆往來盈卷軸除官遞互掌絲綸  
制從長慶詞高古詩到元和體變新各有文姬才擇齒  
俱無通子繼餘塵琴書何必求王粲與女猶勝與外人

答微之見寄

自注時在  
即樓對雪

可憐風景浙東西先數餘杭次會稽禹廟未勝天竺寺  
錢湖不羨若耶溪擺塵野鶴春毛暖拍水沙鷗濕翅低  
更對雪樓君愛否紅欄碧甃點銀泥

腹聯先將雪意寫透結句點出好景如畫

得湖州崔十八使君書喜與杭越隣郡因成長句  
代賀兼寄微之

三郡何因此結緣貞元科第忝同年故情歡喜開書後  
舊事思量在眼前越國封疆吞碧海杭城樓閣入青煙

吳興卑小君應屈為是蓬萊最後仙

自注貞元初同登科崔君名最在後

當時崔自詠云人間不會雲間事應笑蓬萊最後仙

逐句相承篇法綿密却滅盡針線之迹由其律熟而氣厚也

汪立名曰按紀事崔元亮刺湖州時白公刺杭元微之以觀察刺越有唱和詩號三州唱和集

### 贈侯三郎中

老愛東都好寄身足衆多竹少埃塵年豐最喜唯貧客

秋冷先知是瘦人幸有琴書堪作伴苦無田宅可為隣  
洛中縱未長居得且與田蘇遊過春

善以文言道俗情本色語倍覺雅馴

履道新居二十韻

履道坊西角官河曲北頭林園四隣好風景一家秋門  
閉深沉樹池通淺沮溝拔青松直上鋪碧水平流離菊  
黃金合窻筠綠玉稠疑連紫陽洞似到白蘋洲僧至多  
同宿賓來輒少留豈無詩引興兼有酒銷憂移榻臨平



岸攜茶上小舟果穿聞鳥啄萍破見魚遊地與塵相遠  
人將境共幽汎潭菱點鏡沉浦月生鈎厨曉煙孤起庭  
寒雨半收老飢初受粥瘦冷早披裘洛下招新隱秦中  
忘舊遊辭章留鳳閣班籍寄龍樓病慙官曹靜閒慚俸  
祿優琴書中有得衣食外何求濟世才無取謀身智不  
周應須共心語萬事一時休

竟體穩洽拔青松直上一聯鍊句尤挺健

夢行簡

天氣妍和水色鮮  
閒吟獨步小橋邊  
池塘草綠無佳句  
虛卧春窗夢阿憐

習用語妙于點化

渡淮

淮水東南濶無風渡亦難  
孤煙生乍直遠樹望多圓  
春浪棹聲急夕陽帆影殘  
濤流宜映月今夜重吟看

自到郡齋僅經旬日方專公務未及宴遊偷閒走  
筆題二十四韻兼寄常州賈舍人湖州崔郎中仍

呈吳中諸客

渭北離鄉客江南守土臣涉途初改月入境已經旬甲  
郡標天下環封極海濱版圖十萬戶兵籍五千人自顧  
才能少何堪寵命頻冒榮慚印綬虛獎負絲綸候病須  
通脈防流要塞津救煩無若靜補拙莫如勤削使科條  
簡攤令賦役均以茲為報效安敢不躬親襦袴提于手  
韋弦佩在紳敢辭稱俗吏且願活疲民常未徵黃霸湖  
猶借寇恂愧無鐙脚政徒忝犬牙隣制誥誇黃絹詩篇

占白蘋銅符拋不得瓊樹見無因警寐鐘傳夜催衙鼓  
報晨唯知對胥吏未暇接親賓色變雲迎夏聲殘鳥過  
春麥風非逐扇梅雨異隨輪武寺山如故王樓月自新  
池塘閒長草綠竹廢生塵暑遣燒神耐晴教曬舞茵待  
還公事了亦擬樂吾身

中幅極盡理煩治劇之畧蓋到郡經旬而規模已定矣  
一結即先憂後樂意乃知居易實具經世之才而當時  
未竟其用為可惜也分司以後時不可為不得已托詩

酒以自娛耳救煩無若靜補拙莫如勤十字凡為守令者當錄置座右

故衫

閭澹緋衫稱老身半披半曳出朱門袖中吳郡新詩本襟上杭州舊酒痕殘色過梅看向盡故香因洗麝猶存曾經爛漫三年著欲棄空箱似少恩

所詠止一衫而衫之色香襟袖衫之時地歲月歷歷清出并著衫之人身分性情亦曲曲傳出却又渾成熨貼

無一點安排痕迹亦絕不假一字纖巧雕琢此香山擅  
場處李商隱輩豈能辦此

泛太湖書事寄微之

煙渚雲帆處處通飄然舟似入虛空玉杯淺酌巡初匝  
金管徐吹曲未終黃夾纈林寒有葉碧琉璃水淨無風  
避旗飛鷺翩翩白驚鼓跳魚撥刺紅澗雪壓多松偃蹇  
巖泉滴久石玲瓏書為故事留湖上吟作新詩寄浙東  
軍府威容從道盛江山氣色定知同報君一事君應羨

五宿澄波皓月中

病中多雨逢寒食

水國多陰常嬾出老夫饒病愛閒眠  
三旬卧度鶯花月一半春消風雨天  
薄暮何人吹觥篋新晴幾處縛鞦韆  
綵繩芳樹長如舊唯是年年換少年

頸聯何其蘊藉宋人年年不帶看花眼  
不是愁中即病中之句便覺徑直少味

重答劉和州

自注來篇云蘇州刺史例能詩西掖吟  
來替左司又云若共吳王鬪百草不如

唯是欠  
西施

分無佳麗敵西施敢有文章替左司隨分笙歌聊自樂  
等閒篇詠被人知花邊妓引尋香徑月下僧留宿釵池  
可惜當時好風景吳王應不解吟詩

不敢替左司但可傲睨吳王即蘇軾云識字方能欺項  
籍也

城上夜宴

留春不住登城望惜夜相將秉燭遊風月萬家河兩岸



笙歌一曲郡西樓詩聽越客吟何苦酒被吳娃勸不休  
從道人生都是夢夢中歡笑亦勝愁

六月三日夜聞蟬

荷香清露墜柳動好風生微月初三夜新蟬第一聲乍  
聞愁北客靜聽憶東京我有竹林宅別來蟬再鳴不知  
池上月誰撥小船行

一片空明詩境至此纔許當一清字直是天分高絕鈍  
根人何從學步

晚起

卧聽夔夔衙鼓聲起遲睡足長心情華簪脫後頭雖白  
堆案拋來眼校明閒上籃輦乘興出醉回花舫信風行  
明朝更濯塵纓去聞道松江水最清

河亭晴望

九月  
八日

風轉雲頭斂煙銷水面開晴虹橋影出秋雁櫓聲來  
靜官初罷鄉遙信未迴明朝是重九誰勸菊花杯

氣味近老杜

夢蘇州水閣寄馮侍御

揚州驛裏夢蘇州夢到花橋水閣頭  
覺後不知馮侍御此中昨夜共誰遊

吳郡志戴顓宅北禪寺唐司勳郎中陸洿嘗居之有  
花橋水閣

太湖石

煙翠三秋色波濤萬古痕  
削成青玉片截斷碧雲根  
風氣通巖穴苔紋護洞門  
三峯具體小應是華山孫

律法渾成腹聯刻畫絕警結句陡健有力

秘省後廳

槐花雨潤新秋地桐葉風翻欲夜天  
盡日後廳無一事  
白頭老監枕書眠

寄殷協律

自注多叙  
江南舊遊

五歲優游同過日一朝消散似浮雲  
琴詩酒伴皆拋我  
雪月花時最憶君  
幾度聽雞歌白日亦曾騎馬詠紅裙  
吳娘暮雨蕭蕭曲自別江南更不聞

無限感慨治語更淒涼

臨都驛答夢得六言二首

揚子津頭月下臨都驛裏燈前昨日老于前日去年春  
似今年

謝守歸為祕監馮公老作郎官前事不須問著新詩且  
更吟看

節短音長

春詞

低花樹映小妝樓春入眉心兩點愁斜倚欄干背鸚鵡  
思量何事不回頭

艷體妙于蘊藉

送敏中歸甌寧幕

六十衰翁兒女悲傍人應笑爾應知弟兄垂老相逢日  
杯酒臨歡欲散時前路加餐須努力今宵盡醉莫推辭  
司徒知我難為別直過秋歸未訝遲

情景一湧而出清空如話倍覺沉著深摯惻惻動人棣

華雁影浮詞不掃自去

池窗

池晚蓮芳謝窗秋竹意深更無人作伴唯對一張琴

送鶴與裴相臨別贈詩

司空愛爾爾須知不信聽吟送鶴詩羽翮勢高寧惜別  
稻粱恩厚莫愁飢夜棲少共鷄爭樹曉浴先饒鳳占池  
穩上青雲勿回顧的應勝在白家時

腹聯便是一生得力處豈徒贈鶴兼可風世正與送崔

考功赴闕意同

馮斑曰比興忠厚

烏夜啼

城上歸時晚庭前宿處危月明無葉樹霜滑有風枝啼  
澀飢喉咽飛低凍翅垂畫堂鸚鵡鳥冷暖不相知  
夜景刻畫極警一結托興尤深

送東都留守令狐尚書赴任

翠華黃屋未東巡碧洛青嵩付大臣地稱高情多水竹



山宜閒望少風塵  
龍門即擬為遊客  
金谷先憑作主人  
歌酒家家花處處  
莫空管領上陽春

汪立名曰按寶歷二年敬宗欲幸東都諫者皆不聽  
已使按修宮闕賴裴度婉言而罷明年為文宗太和  
元年令狐楚以三年春留守東都故公首句及此蓋  
文宗方勵精圖治盡反敬宗弊政未東巡之語有微  
辭焉

想東遊五十韻

并序

太和三年春予病免官後憶遊浙右數郡兼思到越  
一訪微之故兩浙之間一物以上想皆在目吟且成  
篇不能自休盈五百字亦猶孫興公想天台山而賦  
之也

海內時無事江南歲有秋生民皆樂業地主盡賢侯郊  
靜銷戎馬城高逼斗牛平河七百里沃壤二三州坐有  
湖山趣行無風浪憂食寧妨解纜寢不廢乘流泉石諳  
天竺煙霞識虎丘餘芳認蘭澤遺詠思蘋洲菡萏紅塗

粉菰蒲綠潑油鱗差漁戶舍綺錯稻田溝紫洞藏仙窟  
玄泉貯怪湫精神昂老鶴姿彩媚潜蚪靜閱天工妙閒  
窺物狀幽投竿出比目擲果下獼猴味苦蓮心小漿甜  
蔗節稠橘苞從自結藕孔是誰鏤逐日移潮信隨風變  
擢謳遞夫交烈火候吏次鳴騶梵塲形疑踊閭門勢欲  
浮客迎攜酒榼僧待置茶甌小宴閒談笑初筵雅獻酬  
稍催朱蠟炬徐動碧牙籌圓琰飛蓮子長裾曳石榴拓  
枝隨畫鼓調笑從香毬幕颺雲飄檻簾褰月露鉤舞繁

紅袖凝

去聲

歌切翠眉愁絃管寧容歇杯盤未許收良辰

宜酩酊卒歲好優游膾縷鮮仍細蓴絲滑且柔飽餐為

日計穩睡是身謀名媿空虛得官知止足休自嫌猶屑

屑衆笑太悠悠物表疎形役人寰足悔尤蛾須遠燈燭

鬼勿近置罟幻世春來夢浮生水上漚百憂中莫入一

醉外何求未死癡王湛無兒老鄧攸蜀琴安膝上周易

在牀頭去去無程客行行不繫舟勞君頗問訊勸我少

淹留

自注自此後並屬微之

雲雨多分散關山苦阻修一吟江月

別七見日星周珠玉傳新什鴟鸞念故傳懸旌心宛轉  
束楚意綢繆驛舫粧青雀官槽林紫騮鏡湖期遠泛禹  
穴約冥搜預埽題詩壁先開望海樓飲思親履舄宿憶  
並衾裯志氣吾衰也風情子在不應須相見後別作一  
家遊

洋洋纚纚一氣轉旋細意熨貼層次井然起伏照應極  
變化斷續之妙

將至東都先寄令狐留守

黃鳥無聲葉滿枝  
閒吟想到洛城時  
惜逢金谷三春盡  
恨拜銅樓一月遲  
詩境忽來還自得  
醉鄉潛去與誰期  
東都添箇狂賓客  
先報壺觴風月知

詩境忽來還自得  
蕭子顯所謂須其自來不以力構也  
杜甫詩成覺有神亦是此意

晚桃花

一樹紅桃亞拂池  
竹遮松蔭晚開時  
非因斜日無由見  
不是閒人豈得知  
寒地生材遺校易  
貧家養女嫁常遲

春深欲落誰憐惜白侍郎來折一枝

比意深婉總從一晚字生情寒地生材句自是主意以  
貧家養女句更切桃花故仍以上句作陪律法極細

阿雀

謝病卧東都羸然一老夫孤單同伯道遲暮過商瞿豈  
料鬢成雪方看掌弄珠已衰寧望有雖晚亦勝無蘭入  
前春夢桑懸昨日孤里閭多慶賀親戚共歡娛膩剃新  
胎髮香綳小繡襦玉芽開手爪酥顆點肌膚弓冶將傳

汝琴書勿墜吾未能知壽夭何暇慮賢愚乳氣初離殼  
啼聲漸變雛何時能反哺供養白頭烏

寫小兒初生端詳入細一結喜極不覺慮其將來軟語  
心酸逼真老人情景此種自讓香山獨步



御選唐宋詩醇卷二十五